

卷之四



宋文紀卷第三

晉陽張焯

訂閱江東梅鼎祚纂輯

燕中周維新

孝武帝

名駿字休龍文帝第三子封武陵王為江州刺史起誅元凶劭自立在位十一年廟

號世祖

臨徐兗二州搜揚教

徐方地兼梁楚秀士攸出兗土樂頌所流風禮自古豈不異人比肩鴻才世及或踈散山林不聞進達或  
栖息閭閻懷寶待耀孝悻義門明經善政者所在搜  
揚舉進咸用名聞



在藩上白雉表

白體表素彩儀稟識自擾陶氣仁風練色淳露不蘄

一飲之逸不資三逸之勤

下並藝文類聚

建平王宏冠表

宏筮辰協吉撰禮備容資比成德允被休典

廣陵王誕冠表

臣誕年禮既升擇休申冠順棄有成服美任典

慶雲贊

非煙非霧曳紫流光懸華曜藻奄鬱一堂粵予休明  
震乎珍祥積慶有文靈貺無疆

洞井贊

絡紀山瑞紫志川靈金膏溢曜玉樹含英端巖鏡泉  
挹祥吐禎彪彬仙牒揮翕詭經

清暑殿西薨嘉禾贊

維彼粵周有穗表禎祥乎合矣超瑞高薨非原非澤  
乃瑞乃靈庶藉天貺廣茲化清

梨花贊

沃瘠異壤舒慘殊時惟氣在春具物含滋嘉樹之生  
于彼山基開榮布彩不離塵緇

孤桐贊



珍無隱德產必有甄資此孤幹獻枝楚山稍星雲界  
衍葉炎塵名列貢寶器贊虞絃

巡幸舊宮頌

惟皇敬眷永慕徐京列裝青野動軌丹廷榮和首律  
景澤開年林垆發色川郊列泉沿沂遙衍登陟迴懸  
踐域負外即宮臨山思申陵寢歡結粉都眇懷沛澤  
勤念宛吾納壽遺老設飲先居堂序 朝秀廷集閭

芳春琴堂橘連理頌

列訪神秘詳觀瑞策通柯竦秀寔靈所錫離條別榦  
淹一榮戚道被遐夷承我正曆

故侍中司徒建平王墓誌銘

含榮幼耀膺和早慧徘徊天人優遊經藝鴻沴纒流  
皇根中絕體孝盡性懷追孝烈反我宸居毀綱更結  
管機疑務端朝贊契召輝才融士穎風折秘路長陰  
昭塗永滅

太室牛鼎銘

陳隨隱漫錄云紹興初有獻鼎于  
行都上賜三茅觀高一尺三寸有  
咫兩耳旁出三足與首皆類牛腹外周紋如  
篆籀腹內篆銘乃宋孝武帝孝建元年八月  
二日肇作以  
享太室者

維甲午八月丙寅帝若稽古肇宋鼎審厥象作牛鼎  
格于太室從用享億萬寧神休惟帝時寶萬世其永



賴田汝成西湖志載宋高宗紹興二十年出古器賜三茅寧壽觀其一漢鼎云有漢建元三年八月作

牛鼎祀太室銘曰惟甲午丙寅帝若稽古肇作宋器審厥象作牛鼎格于位室從用饗億寧神休惟帝時保萬世其永賴鼎按建元乃漢武帝三年為癸卯宋孝武帝孝建元年甲午也且中有肇宋語志當傳訛而辭

小異

### 祈晴文

幽明失序就陰則滯連雨霖霖注而不替潤既違時

澤而非惠幸輟霖而吐景權停雲而斂翳照鸞輅於

大郊光龍旂於田祭手耜得施黍稷獲藝增高廩於

嘉年登十千於茲歲甄文類聚

### 擬漢武李夫人賦序

殷淑儀寵傾後宮及薨進號貴妃謚曰宣上痛愛不

已遂擬是賦又諷有司奏立新廟

朕以亡事棄日閱覽前王詞苑見李夫人賦悽其有

懷亦嗟詠久之因感而會焉

### 大使巡省風俗詔

世祖以元嘉三十年四月自江州入討元凶至新亭即位

五月克定京邑逆黨伏誅下詔

天步艱難國道用否雖基構未固而氣數時愆朕以

眇身奄承皇業奉尋曆命寤寐震懷萬邦風政人治

之本感念陵替若疚在心可分遣大使巡省方俗

### 施行經給之宜詔

三十年六月

與王立訓務弘治節輔臣佐時勤獻政要仰惟聖規



每存茲道猥以眇躬屬承景業闡揚遺澤無廢厥心  
夫量入爲出邦有恒典而經給之宜多違常度兵役  
糜耗府藏散減外內衆供未加損約非所以聿遵先  
旨敬奉遺圖自今諸可薄已厚民去煩從簡者悉宜  
施行以稱朕意

舉羣善詔

三十年七月

世道未夷惟憂在國夫使羣善畢舉固非一才所議  
况以寡德屬衰薄之期夙宵寅想未懷待旦王公卿  
士凡有嘉謀善政可以維風訓俗咸達乃誠無或依  
隱

崇約弛禁詔

三十年七月

百姓勞弊徭賦尚繁言念未乂宜崇約損凡用非軍  
國宜悉停功可省細作并尚方雕文靡巧金銀塗飾  
事不關實嚴爲之禁供御服膳減除遊侈水陸捕採  
各順時月官私交市務令優衷其江海田池公家規  
固者詳所開弛貴戚競利悉皆禁絕

勸農舉士詔

孝建元年正月

首食尚農經邦本務貢士察行寧朝當道內難甫康  
政訓未洽衣食有仍耗之弊選造無觀國之美昔衛  
文勤民高宗恭默卒能收賢巖穴大殷季年朕每側



席疚懷無忘鑒寐凡諸守蒞親民之官可詳申舊條  
勸盡地利力田善蓄者在所具以名聞褒甄之科精  
爲其格四方孝秀非才勿舉獻答允值即就銓擢若  
止無可採猶賜除署若有不堪酬奉虛竊榮薦遣還  
田里加以禁錮尚書百官之原本庶績之樞機丞郎  
列曹局司有在而頃事無巨細悉歸令僕非所以衆  
材成構羣能濟業者也可更明體制咸責厥成糾覈  
勤惰嚴施賞罰

建孔廟詔

元年十月

仲尼體天降德維周興漢經緯三極冠冕百王爰自

前代咸加褒述典司失人用闕宗祀先朝遠存遺範  
有詔繕立世故妨道事未克就國難頻深忠勇奮厲  
實憑聖義大教所敦永惟兼懷無忘待旦可開建廟  
制同諸侯之禮詳擇爽塏厚給祭秩

諸苑假與貧民詔

二年八月

諸苑禁制綿遠有妨肄業可詳所開弛假與貧民

惠宥臯徙詔

二年九月

國道再屯艱虞畢集朕雖寡德終膺鴻慶惟新之旨  
寔深百王而惠宥之令未殊常渥永言勤慮寤寐載  
懷在朕受命之前凡以臯徙放悉聽還本犯釁之門



尚有存者子弟可隨署吏

選散騎常侍詔

初晉世散騎常侍選望甚重與侍中不異其後用人漸輕孝建

三年世祖欲重其選下詔吏部尚書顏竣奏薦孔顛王彥

散騎職為近侍事居規納置任之本寔惟親要而頃

選常侍陵遲未允宜簡授時良永寘清轍

顏竣奏

常侍華選職任俟才新除臨海太守孔顛意業閑素

司徒長史王彥懷尚清理並任為散騎常侍

聽申奏詔

大明元年十月

旒纒之道有孚于結繩日昃之勤已切于姬后况世

弊教淺歲月澆季朕雖戮力寓內未明求衣而識狹

前王務廣昔代永言菲德其愧良深朝咨野怨自達

者寡惠民利公所昧寔眾自今百辟庶尹下民賤隸

有懷誠抱志擁鬱衡閭失理負謫未聞朝聽者皆聽

躬自申奏小大以聞朕因聽政之日親對覽焉

春務貸給糧種詔

二年正月

去歲東土多經水災春務已及宜加優課糧種所須

以時貸給

追叙先恩詔

二年正月

先帝靈命初興龍飛西楚歲紀浸遠感往纏心奉迎



文武情深常隸思弘殊澤以申永懷吏身可賜爵一級軍戶免為平民

牧守卹贈貧弱詔二年二月

政道未著俗弊尚深豪侈兼并貧弱困窘存闕衣裳沒無歛槨朕甚傷之其明敕守宰勤加存卹賻贈之科速為條品

寬申逋亡詔二年六月

往因師旅多有逋亡或連山染逆懼致軍憲或辭役憚勞苟免刑罰雖約法從簡務思弘宥恩令驟下而逃逋猶多豈習愚為性忤惡難反將在所長吏宣導

乖方可普加寬申咸與更始

審貢賦詔二年十月

夫山處巖居不以魚鼈為禮頃歲多虞軍調繁切遠方設賦本濟一時而主者玩習遂為常典杻幹瑤琨任土作貢積羽羣輕終致深弊永言弘革無替朕心凡寰衛貢職山淵採捕皆當詳辨產殖考順歲時勿使牽課虛懸睽忤氣序庶簡約之風有孚於品性惠敏之訓無漏于幽仄

賻給北討文武詔二年八月

近北討文武於軍亡沒或殞身矢石或癘疾死亡並



盡勤王事而歛榷卑薄可普更賻給務令豐厚

原宥徒隸詔三年八月

昔姬道方凝刑罰斯厝漢德初明犴圜用簡良由上一其道下淳其性今民澆俗薄誠淺偽深重以寡德弗能心化故知方者尠趣辟寔繁向因巡覽見二尚方徒隸嬰金履校既有矜復加國慶民和獨隔凱澤益以慙焉可詳所原宥

依舊聽訟詔三年九月

夫五辟三刺自古所難巧法深文在季彌甚故沿情察訟魯師致捷市獄勿擾漢使飛聲廷尉遠邇疑誠

平決攸歸而一蹈幽圜動逾時歲民嬰其困吏容其私自今囚至辭具並即以聞朕當悉詳斷庶無留獄若繁文滯劾證逮遐廣必須親察以盡情狀自後依舊聽訟

行親桑詔三年十月

古者薦鞠青壇聿祈多慶分繭玄郊以供純服來歲可使六宮妃嬪修親桑之禮

皇太后親桑禮詔孝武王皇后傳云大明四年三月后率六宮躬桑于西郊

皇太后觀禮上下詔

朕卜祥大昕測辰拂羽爰詔六宮親蠶川室皇太后



降鑾從御行蹕觀禮綠籩既具玄統方修庶儀發椒  
闈化動中縣妃主以下可量加班錫

詳減四時供限詔

四年四月

昔紱衣御寓貶甘示節上簋臨天飭儉昭度朕綈帛  
之念無忘于懷雖深詔有司省遊務實而歲用兼積  
年量虛廣豈以捐豐從損允稱約心四時供限可詳  
減大半庶裘絺順典有偃民華纂組傷工無競壅市

卹贍疫癘詔

四年

都邑節氣未調疫癘猶衆言念民瘼情有矜傷可遣  
使存問并給醫藥其死亡者隨宜卹贍

閱武原赦詔

五年二月

昔人稱人道何先於兵爲首雖淹紀勿用忘之必危  
朕以聽覽餘閒因時講事坐作有儀進退無爽軍禮  
以下普量班錫頃化弗能孚而民未知禁逋役違調  
起觸刑網凡諸逃亡在令昧爽以前悉皆原赦已滯  
囹圄者釋還本役其逋負在大明三年以前一賜原  
停自此以還鰥貧疾老詳所申減伐蠻之家蠲租稅  
之半近籍改新制在所承用殊謬寔多可普更符下  
聽以今爲始若先已犯制亦同蕩然

南徐兗二州緩租詔

五年二月



南徐兗二州去歲水潦傷年民多困窶逋租未入者可申至秋登

雨水遣使巡行詔

五年七月

雨水猥降街衢泛溢可遣使巡行窮弊之家賜以薪粟

脩葺庠序詔

五年八月

自靈命初基聖圖重遠參正樂職感神明之應崇殖禮囿奮至德之光聲寔同和文以均節化調其俗物性其情故臨經式奠煥乎炳發道喪世屯學落年求獄訟微衰息之術百姓忘退素之方今息警夷嶂恬

波河渚棧山航海鄉風慕義化民成俗茲時篤矣來歲可修葺庠序旌延國胄寅制方鎮所假白板郡縣年限依臺除食祿三分之一不給送

簡惠王畿詔

五年十一月

王畿內奉京師外表衆夏民殷務廣宜思簡惠可遣尚書就加詳檢并與守宰平治庶獄其有疑滯具以狀聞

大閱詔

七年正月

春蒐之禮著自周令講事之語書于魯史所以昭宣德度示民軌則今歲稔氣榮中外寧晏當因農隙葺



文紀 卷三  
是舊章可克日于玄武湖大閱水師并巡江右講武  
校獵

遣祭霍山詔

七年二月

江漢楚望咸秩周禋禮九疑於盛唐祀蓬萊於渤海  
皆前載流訓列聖遺式霍山是曰南嶽寔惟國鎮韞  
靈呈瑞肇光宋道朕駐蹕于野有事岐陽瞻睇風雲  
徘徊以想可遣使奠祭

校獵歷陽大赦詔

七年二月車駕校獵于歷陽之烏江

朕受天慶命十一年於茲矣憑七廟之靈獲上帝之  
力禮橫四海威震八荒方巡三湘而奠衡嶽次九河

而檢云岱今恢覽功成省風畿表觀民六合蒐校長  
洲騰沙飛礫平嶽蕩海藪晉合序鏡鉦協節獻鬯如  
禮饁獸傾郊敬舉王公之觴廣納士民之壽八風循  
通卿雲叢聚盡天罄瑞率宇竭歡思散太極之泉以  
福無方之外可大赦天下行幸所無出今歲租布其  
逋租餘債勿復收賜民爵一級女子百戶牛酒刺守  
邑宰及民夫所蒐者普加洽賚

又詔

朕弱年操製出牧阿維承政宣風薦歷年紀國步中  
阻治戎江甸難夷情義寔繫于懷今或練蒐訓旅涉



文系 卷三  
茲境閭故邑耆舊在日罕存年世未遠殲亡大半撫  
迹惟事傾慨兼著太宗燕故晉陽洽恩世祖流仁濟  
畿暘澤永言往猷思廣前賚可蠲歷陽郡租輸三年  
遣使巡慰問民疾苦鰥寡孤老六疾不能自存者厚  
賜粟帛高年加以羊酒凡一介之善隨才銓貫前國  
名臣及府州佐吏量所沾錫人身已往施及子孫

禁專殺詔

七年四月

自非臨軍戰陳一不得專殺其罪甚重辟者皆如舊  
先上須報有司嚴加聽察犯者以殺人罪論

敕刺史守令奉手詔詔

七年五月

自今刺史守宰動民興軍皆須手詔施行唯邊隅外  
警及姦釁內發變起倉卒者不從此例

檢糾占固山澤詔

七年七月

前詔江海田池與民共利歷歲未久浸以弛替名山  
大川往往占固有司嚴加檢糾申明舊制

秋旱賑給詔

七年八月

昔匹婦含怨山樵北鄙孀妻哀慟臺傾東國良以誠  
之所動在微必著感之所震雖厚必崩朕臨察九野  
志深待旦弗能使爛然成章各如其節遂令炎精損  
和陽偏不施歲云不稔咎寔朕由大官供膳宜從貶



撤近道刑獄當親料省其王畿內及神州所統可遣  
尚書與所在共訊畿外諸州委之刺史并訊省律令  
思存利民其考謫賢襲在大明七年以前一切勿治  
尤弊之家開倉賑給

貸麥種詔

七年九月

近災精亢序苗稼多傷今二麥未晚甘澤頻降可下  
東郡境勤課墾殖尤弊之家量貸麥種

省方詔

七年九月

昔周王驥迹寔窮四溟漢帝鑿軫夙徧五嶽是皆所  
以上對幽靈下理民土自天昌替馭臨宮創圖禮代

天鬱世貿興毀皇家造宋日月重光璇璣得序五星  
順命而戎車歲動陳詩義闕朕聿含五光奄一天下  
思盡寶戒之規以塞謀危之路當沿時省方觀察風  
俗外詳考舊典以副側席之懷

車駕巡南豫州詔

七年十月

朕巡幸所經先見百年者及孤寡老疾並賜粟帛獄  
繫刑罪並親聽訟其士庶或怨鬱危滯受抑吏司或  
隱約潔立負擯州里皆聽進朕前面自陳訴若忠信  
孝義力田殖穀一介之能一藝之美悉加旌賞雖秋  
澤頻降而夏旱嬰弊可即開行倉並加賑賜



行幸考績詔

七年十月

賞慶刑威奄國彞軌黜幽升明闢寓恒憲故採言聆風式觀侈質貶爵加地于是乎在今類帝宜社親巡江甸因覲嶽守躬求民瘼思弘明試之典以申考績之義行幸所經蒞民之職功宣于聽即加甄賞若廢務亂民隨讐議罰主者詳察以聞

停東境雜稅詔

八年正月

東境去歲不稔宜廣商貨遠近販鬻米者可停道中雜稅其以仗自防悉勿禁

收拯東境詔

八年二月

去歲東境偏旱田畝失收使命來者多至乏絕或下窮流穴頓伏街巷朕甚閔之可出倉米付建康秣陵二縣隨宜贍卹若温拯不時以至捐棄者嚴加糾劾

巡幸賑卹詔

初學記

夫足踐目見寔遵天命尚怨踰深毗俗未同其化自遠幽隱不得其所故降省風俗躬撫黎元

巡狩省風俗詔

初學記

朕聿合五色奄一天下當沿時省方觀察風俗外詳考舊典以副側席之懷也

建明堂詔

大明五年詔有司奏依晉裴頡議但作大殿屋雕畫而已



昔文德在周明堂崇祀高烈惟漢汶邑斯尊所以職祭罔讐氣令斯正鴻名稱首濟世飛聲朕皇考太祖文皇帝功曜洞元聖靈昭俗內穆四門仁濟羣品外薄八荒威憺殊俗南腦勁越西髓剛戎裁禮興稼穡之根張樂協四氣之紀匡飾墳序引無題之外旌延寶臣盡盛德之範訓深劭農政高刑厝萬物隸通百神薦祉動協天度下沿地德故精緯上靈動殖下瑞諸侯軌道河濂海夷朕仰憑洪烈入于萬姓皇考降祐迄將一紀思奉揚休德未播無窮便可詳考姬典經始明堂宗祀先靈式配上帝誠敬克展幽顯咸秩惟懷永遠感慕崩心

有司詔

伏尋明堂辟雍制無定文經記參差傳說乖舛名儒通哲各事所見或以爲名異實同或以爲名實皆異自漢暨晉莫之能辨周書云清廟明堂路寢同制鄭玄注禮義生于斯諸儒又云明堂在國之陽丙巳之地三里之內至于室宇堂个戶牖達向世代湮緇難得該詳晉侍中裴頠西都碩學考詳前載未能制定以爲尊祖配天其義明著廟宇之制理據未分直可爲殿以崇嚴紀其餘雜碎一皆除之參詳鄭玄之注



差可準據裴頠之奏竊謂可安國學之南地寔丙巳  
爽塏平暢足以營建其墻宇規範宜擬則太廟唯十  
有二間以應蕃數依漢汶上圖儀設五帝位太祖文  
皇帝對饗祭皇天上帝雖為差降至于三載恭祀理  
不容異自郊祖宮亦宜共日禮記郊以特牲詩稱明  
堂羊牛吉蠲雖同質文殊典且郊有燔柴堂無禋燎  
則鼎俎彝簋一依廟禮班行百司搜材簡工權置起  
部尚書將作大匠量物商程尅今秋繕立

置古帝王冢戶銘太平御覽

先代帝王因時創業君人建國禮尊南面而歷運推

移年代久遠丘壠殘毀樵牧相趨坐兆湮蕪封樹莫  
辨自古以來帝王陵墓可隨近十戶蠲其役以供守  
視

立闕詔輿地志云博望梁山東西隔江相對如門相去數里謂之天門宋孝武詔仍以

二山立闕

梁山天表象魏以施國形

分置吏部尚書詔上常慮權移臣下以吏部尚書選舉所由欲輕其勢力大

明二年下詔分置又別詔太宰江夏王義恭於是吏部置尚書二人省五兵尚書謝莊及度支尚書顧顛之並補選職

八柄馭下以爵為先九德咸事政典居首銓衡治樞



與替攸寄頃世以來轉失厥序徒秉國鈞終貽權訪  
今南北多士勲勤彌積物情善否寔繫斯任官人之  
詠維聖克允則哲之美粵帝所難加澆季在俗讓議  
成風以一人之識當羣品之誚望沈浮自得庸可致  
乎吏部尚書可依郎分置并詳省閑曹

別詔太宰江夏王義恭

分選詔旦出在朝論者亦有同異誠知循常甚易改  
舊生疑但吏部尚書由來與錄共選良以一人之識  
不辨洽通兼予奪威權不宜專一故也前述宣先旨  
敬從來奏省錄作則未貽後昆自此選舉之要唯由

元凱一人若通塞乖衷而訴達者尠且違令與物理  
至隔闕前王盛主猶或難之况在寡闇尤見其短又  
選官裁病即嗟誚滿道人之四體會盈有虛旬日之  
間便至怨詈况寔有假託不由寢頓者耶一詣不前  
貧苦交困則兩邊致患互不相體校之以實並有可  
哀若職置二人則無此弊兼選曹樞要歷代斯重人  
經此職便成貴塗已心外議咸不自限故范曄魯爽  
舉兵滅門以此言之寔由榮厚勢驅殷繁所致設可  
擬議此授唯有數人本積歲月稍加引進而理無前  
期多生慮表或嬰艱抱疾事至回移官人之任决不



可闕一來一去向人已周非有黜責已貴難賤既成  
姑長寘之無所盛衰遞襲便是一段世臣相處之方  
臣主生疑所以彌覺此職宜在降階監令端右足處  
時望無人則闕異于九流今但直銓選部有減前資  
物情好猜橫立別解本旨向意終不外宣唯有從郎  
分置視聽自改選既輕先民情已變有堪其任大展  
遷回兼常之宜以時稍進本職非復重官可得不須  
帶帖數過居之盡無詒怪自中分荆揚子時便有意  
於此正訝改過不少容生駭惑爾來多年欲至歲下  
處分會何偃致故應有親人故近因此施行本意詔

文不得委悉故復紙墨具陳

臺省相臨詔

長沙王義欣次子祗大明中爲中書郎太宰江夏王義恭領中書監

服親不得相臨表求解職下詔

昔二王兩謝俱至崇禮自今三臺五省悉同此例

行幹杖詔

初五省官所給幹僮不得雜役沈統爲著作佐郎坐輕役過差奏免世祖

詔下

自頃幹僮多不祇給主可量聽行杖

增諸弟國封詔

大明五年

昔韓衛異姓宗周之明憲三封殊級往晉之令典惟  
皇家創典盡弘斯義朕應天命光宅四海思所以憲



章前式崇建懿親永垂畫一著于甲令諸弟國封並  
可增益千戶

荅太子子業 廢帝見後

前廢帝幼而狷急在東宮每為世祖所責世祖西巡子業啓參承起居書迹不謹上詰讓之子業啓事陳謝上又答之

書不長進此是一條耳聞汝素多懈怠狷戾日甚何以頑固乃爾耶 宋書

荅廬江王禕 南平王鑠蚤薨子敬淵婚禕往視之白世祖借伎因荅

婚禮不舉樂且敬淵等孤苦倍非宜也

封將帥功臣等詔 世祖伐逆定亂思將帥之功下詔

朕以不天有生罔二泣血千里志復深逆鞠旅伐罪  
義氣雲湧羣師仗節指難如歸故曾未積旬宗社載  
穆遂以眇身猥纂大統永念茂庸思崇徽錫新除使  
持節散騎常侍都督南兗豫徐兗四州諸軍事鎮軍  
將軍南兗州刺史沈慶之新除散騎常侍領軍將軍  
柳元景新除散騎常侍右衛將軍宗慤督兗州諸軍  
事輔國將軍兗州刺史徐遺寶寧朔將軍始興太守  
沈法系驃騎咨議參軍顧彬之或盡誠謀初宣綜戎  
略或受命元帥一戰寧亂或稟奇軍統協規效捷偏  
師奉律勢振東南皆忠國忘身義高前烈功載民聽



誠簡朕心定賞策勲茲焉攸在宜列土開邑永蕃皇家慶之可封南昌縣公元景曲江縣公並食邑三千戶愨洮陽縣侯食邑二千戶遺寶益陽縣侯食邑一千五百戶法系平固縣侯彬之陽新縣侯並食邑千戶

追贈文帝王皇后母平樂鄉君詔

昔漢道既靈博平輝絕魏國方安嘉憲啓策皆因心所弘酌典沿誥亡外祖親王夫人柔德淑範光啓坤載屬內位闕正攝饋閨庭儀被芳闈問宣戚里永言感遠思追榮秩宜式傍鴻則敬登徽序

又詔

趙蕭臧光祿袁敬公平樂郡君墓先未給塋戶加世數已遠胤嗣衰陵外戚尊屬不宜使墳塋蕪穢可各給蠻戶三以供灑掃

追贈張敷詔

敷父亡以毀卒世祖即位詔贈

司徒故左長史張敷貞心簡立幼樹風規居哀毀滅孝道淳至宐在追甄於以報美可追贈侍中

追贈王微詔

微棲志貞深文行惇洽生自華宗身安隱素足以賁茲丘園惇是薄俗不幸蚤世朕甚悼之可追贈秘書



荅劉懷珍詔 懷珍孝建中以破虜功拜建武將軍樂陵河間二郡太守明年啓求

還孝武荅

邊維須才未宜陳請

祭袁湛墓詔 大明三年幸籍田行經湛墓下詔祭

故侍中左光祿大夫開府儀同三司晉寧敬公外氏

尊戚素風簡正歲紀稍積墳塋浸遠朕近巡覽千畝

遙瞻松隧緬惟微塵感慕增結可遣使祭少申永懷

祭殷景仁墓詔 大明五年行幸經景仁墓下詔

司空文成公景仁德量淹正風識明允徽績忠漢爪

達先照惠政茂譽寔留民屬近瞻丘墳感往興悼可

遣使致祭

卹賜徐湛之江湛王僧綽門戶詔 三人為元凶劾所殺世祖

並追贈又詔三家長給廩

徐湛之江湛王僧綽門戶荼酷遺孤流寓言念既往

感痛兼深可令歸居本宅厚加卹賜

誅王僧達詔 僧達屢經在逆上以終無悛心因南彭城蕃縣民高闡謀反伏誅下

詔即其事陷之於獄賜死

王僧達餘慶所鍾早登榮觀輕險無行暴于世談值

國道中艱盡室願效甄其薄誠貫其鴻恩爵遍外內



身窮榮寵曾無在泮食堪懷音乃協規西楚志擾東  
區公行剽掠顯奪凶黨倚結羣惡誣亂視聽朕每容  
隱思加蕩雪曾無犬馬感恩之志而炎火成燎原之  
勢涓流兆江海之形遂唇齒高閣契歸蘇寶搜詳妖  
圖覘察象緯逮賊長臨梟餘黨就鞫咸布辭獄牒宣  
言虛市猶欲隱忍法為情屈小醜紛紜人扇方甚矯  
構風塵志希非覲固已達諸公卿昭于朝野朕焉得  
輕宗社之重行匹夫之仁殛山誅邪聖典所同戮諷  
剪律漢法攸尚便可收付廷尉肅正刑書故太保華  
容文昭公弘契闔歷朝綢繆眷遇豈容忘茲勳德忽

其世祀門爵國姻一不貶絕

與東揚州刺史顏竣詔

竣字士遜瑯琊臨沂人延之子

建平王宏字休度文帝第七子謙儉周慎明  
曉政事世祖甚信仗之歷為中書監尚書令  
加散騎常侍薨痛悼甚至與竣詔

宏夙情業尚素心令績雖年未及壯願言兼申謂天  
道可倚輔仁無妄雖寢患淹時慮不至禍豈圖祐善  
虛設一旦未謝驚惋摧慟五內交殞平生未遠舉目  
如昨而賞對遊娛緬同千載哀酷纏綿實增痛切卿  
情均休戚重以周旋乖圻少時奄成今古聞問傷惋  
當何可言



又詔

何偃字仲弘尚之中子子戢尚山陰公主歷吏部尚書卒世祖與竣書

何偃遂成異世美志長往與之周旋重以姻媾臨哭傷怨良不能已往矣宜贈散騎常侍金紫光祿大夫本官如故

封劉延孫顏峻詔

朕籍羣能之力雪莫大之恥以眇眇之身託于王公之上思所以策勳樹良永寧世烈新除侍中領前軍將軍延孫率懷忠敏器局沉正協替義初誠力俱盡左衛將軍竣立志開亮理思清要茂策忠暮經綸惟

始俾積基更造成有勤焉宜顯授龜社大啓邦家延孫可封東昌縣侯竣建城縣侯食邑各二千戶

詔劉延孫

延孫彭城呂人

初高祖遺詔京口要地非宗室近戚不得居之大明初竟陵王誕為徐州上深相畏忌不欲使居京口遷之廣陵欲使腹心為徐州據京口以防誕故以南陵授延孫而與合族大明三年詔延孫徵為侍中尚書左僕射

舊京樹親由來常準卿前出所有別議今此防久耳當以還授小兒

贈劉延孫詔

故侍中尚書左僕射領護軍將軍東昌縣開國侯延



孫風局簡正體識沉明綢繆心膺自蕃升朝契闊惟  
舊幾將二紀靈業中圯則首贊出圖義令既舉則任  
均蕭寇器允棟幹勲寔佐時及累司馬兩官出內尹  
牧惠政茂課著自民聽忠謨令節簡乎朕心方燹采  
台階未毗國道奄至薨殞震慟兼深考終定典宜盡  
哀敬可贈司徒給班劔二十人侍中僕射侯如故

賜劉延孫葬送詔

故司徒文穆公延孫居身寡約家素貧虛每念清美  
良深悽歎葬送資調固當闕乏可賜錢二十萬米千  
斛

封龐秀之等詔

世祖入討元凶以伐逆寧亂  
事資羣謀大明元年下詔

昔歲國難方結疑懦者衆故散騎常侍太子右率龐  
秀之履險能貞首暢義節用使狡狀先聞軍備夙固  
醜逆時殄頗有力焉追念厥誠無忘于懷侍中祭酒  
顏師伯侍中領射聲校尉袁愨孫豫章太守王謙之  
太子前中庶子領右衛率張淹爰始入討預叅義謀  
契闊大難宜蒙殊報秀之可封樂安縣伯食邑六百  
戶師伯平都縣子愨孫興平縣子謙之石陽縣子淹  
廣晉縣子食邑各五百戶

勞顏師伯詔

大明二年師伯節度諸將拒  
魏多所斬獲上嘉其功下詔



虜驅率犬羊規暴邊塞輔國將軍青冀二州刺史師  
伯宣略命師合變應機濟成奮怒一月四捷支軍異  
部騁勇齊効頻梟名王大殲羣醜朕用嘉歎良深于  
懷可遣使慰勞并符輔國府詳考攻最以時言上

### 荅王玄謨

玄謨遷雍州刺史加都督雍土多僑寓玄謨  
請上斷流民又令九品以上租使貧富相通  
境內嗟怨訛言玄謨欲反時柳元景當權弟  
僧景為新城太守制令南陽諸郡竝發兵討  
玄謨玄謨令內外晏然以解眾惑馳啓孝武  
具陳本末帝知其虛馳遣主書吳喜公撫慰  
之又荅書玄謖性嚴未嘗妄笑時人  
言玄謨眉頭未曾伸故帝以此戲之

梁山風塵初不介意君臣之際過足相保聊復為笑

伸卿眉頭宋書

同前南史

玄謨啓明白之日七十老公反欲何求聊復為笑想  
足以伸卿眉頭耳

同前資治通鑑合  
書史語為一

七十老公反欲何求君臣之際足以相保聊復為笑

伸卿眉頭耳

詔劉秀之

秀之字道寶穆之  
兄歷雍州刺史

惠開思話子徙御史中丞世祖  
與秀之詔及在任百僚憚之

今以蕭惠開為憲司冀當稱職但一往眼額已自殊



有所震

並宋書

追贈劉秀之詔

秀之歷寧蠻將軍雍州刺史大明八年卒上甚痛惜下詔

秀之識局明遠才應通暢誠著蕃朝績宣累嶽往歲臣逆交構首義萬里及職司端尹贊戎兩宮嘉謀徽譽寔彰朝野漢南法繁民嗛屬佇良牧故暫輟心齋外弘風規出未踰碁德被西服詳考古烈旅觀終始淳心忠槩無以尚茲方式亮皇猷入衛根本奄至薨逝震慟于朕心生榮之典未窮寵數哀終之禮宜盡崇飾兼履謙守約封社弗廣興言悼往益增痛恨可贈侍中司空持節都督刺史校尉如故

顧寶先辭郎詔

寶先大明中為尚書水部郎父琛雖為左丞荀萬秋所劾至是

猶在職寶先自陳不拜世祖詔

敕違糾慢憲司之職若理有不公自當更有釐正而自頃劾無輕重輒至私絕此風難長主者嚴為其科寶先蓋依附世准不足問

周朗徙邊詔

朗積忤旨為廬陵內史丁母艱每哭必慟其餘多不依常節大明四年

年上使有司奏其居喪無禮請加收治詔徙寧州於道殺之

朗悖禮利口宜令剪戮微物不足亂典刑特鑱付邊郡

鄧琬擢給事黃門侍郎詔

琬父胤之初為世祖征虜長史歷光祿勳



琬二弟並以從賊質反敗誅琬時為南海太守在遠又有破蕭簡功得免復為丹陽丞大明七年上幸歷陽追思蕃舊下詔

故光祿勳前征虜長史鄧胤之體局沉隱累任著績  
朕昔當藩重首先佐務心力歎盡弗忘于懷往歲息  
璩凶悖自取誅翦必思及琬特免釁戮今可擢為給  
事黃門侍郎以旌胤之宿誠

蕭惠開更授御史中丞詔

惠開入為侍中詔更授

惠開前在憲司奉法直繩不阿權威朕甚嘉之可更  
授御史中丞

贈卜天與詔

天與元嘉末為廣威將軍領左細仗元凶入弒事變倉卒天與執刀

持弓射賊劬于東堂幾中逆徒擊之倒地見殺世祖即位下詔

日者逆豎犯蹕釁變卒起廣威將軍關中侯卜天與  
提戈赴難挺身奮節斬殪凶黨而旋受虐刃勇冠當  
時義侔古烈興言追悼傷痛于心宜加甄贈以旌忠  
節可贈龍驤將軍益州刺史謚曰壯侯

贈卜天生詔

天生世祖時為龍驤將軍攻廣陵塞塹先登苦戰移日詔賜

天生始受戎任甫造寇壘而投輪越塹率果先騰驍  
壯之氣嘉歎無已可且賜布千匹以厲眾校

徵王素朱百年詔

世祖即位欲搜揚隱退乃下詔

濟世成務咸達隱微軌俗興讓必表清節朕昧旦求



善思惇薄風琅邪王素會稽朱百年並庶約貞遠與物無競自足臯畝志在不移宜加褒引以光難進並可太子舍人

高句驪王高璉進爵詔

大明七年

使持節散騎常侍督平滎二州諸軍事征東大將軍高句驪王樂浪公璉世事忠義作藩海外誠係本朝志翦殘險通譯沙表克宣王猷宜加褒進以旌純節可車騎大將軍開府儀同三司持節常侍都督王公如故

倭王世子興授爵詔

倭王濟之子興遣使貢獻大明六年詔授

倭王世子興奕世載忠作藩外海稟化寧境恭修貢職新嗣邊業宜授爵號可安東將軍倭國王

前廢帝

名子業小字法師孝武帝長子淫暴無道湘東王彧弑之在位二年

即位詔

孝武大明八年閏五月崩太子即位六月詔

朕以眇身夙紹洪業敬御天威欽對靈命仰遵凝緒日鑒前圖寔可以拱默守成詒風長世而寶位告始萬寓改屬惟德弗明昧于大道思宣睿範引茲簡恤可具詢執事詳訪民隱凡曲令密文繁而作治關市僦稅事施一時而姦吏舞文妄興威福加以氣緯舛玄偏頗滋甚宜其寬徭輕憲以救民切御府諸署事



不須廣雕文篆刻無施於今悉宜并省以酬氓願藩  
王貿貨一皆禁斷外便具條以聞

舉才詔

景和元年永光  
元年八月改元

昔凝神佇逸磻溪讚道湛慮思才傳巖岬化朕位御  
三極風澄萬寓資鈇電斷正卯斯戮思所以仰宣遺  
烈俯弘景祚每結夢庖鼎瞻言板築有劬日昃無忘  
昧且可甄訪諸國招聘閭部其有孝性忠節幽居遜  
棲信誠義行廉正表俗文敏博識幹事治民務加旌  
舉隨才引擢庶官克順彝倫咸叙主者精加詳括稱  
朕意焉

江夏王義恭錄尚書事詔

總錄之典著自前代孝建始年雖暫并省而因革有  
宜理存濟務朕煢獨在躬未涉政道百揆庶務允歸  
尊德太宰江夏王義恭新除中書監太尉地居宗重  
受遺阿衡實深憑倚用康庶績可錄尚書事本官監  
太宰王如故侍中驃騎大將軍南兖州刺史巴東郡  
開國公新除尚書令元景同稟顧誓翼輔皇家贊業  
宣風繫公是賴可即本號開府儀同三司領兵置佐  
一依舊准領丹陽尹侍中領公如故

手詔晉安王子勛

子勛孝武  
第三子



子勛加使持節時廢帝任凶多所誅害前撫  
軍諮議參軍何邁少好武頗招集才勇之士  
先尚太祖女新蔡公主帝詐云主薨殺宮人  
代之而納主于後宮深忌邁邁謀因帝出行  
為變迎立子勛事泄帝誅邁使八座奏子勛  
與邁通謀又手詔子勛送藥賜死子勛起兵  
以廢立為名太宗定  
亂子勛號車騎將軍

何邁殺我立汝汝自計孰若孝武耶可自為其所

宋並

同前

後魏

聞汝與何邁謀共廢我汝自量體氣何如孝武尋當  
遣使送藥與汝

封譚金等詔

景和元年誅羣公金等並為之用帝下詔

屯騎校尉南清河太守譚金彊弩將軍童太壹車騎  
中參兵軍沈攸之誠略沈梁忠幹勇鷲消蕩氛翳首  
制鯨凶宜裂河山以酬勲義金可封平都縣男太壹  
宜陽縣男攸之東興縣男食邑各三百戶

封袁顥徐爰詔

顥仕孝武時盛稱太子好學有日新之美及踐位深感之景和

元年遷為吏部尚書又下詔

宗社多故釁因冢司景命未淪神祚再又自非忠謀  
密契豈伊剋殄侍中祭酒領前軍將軍新除吏部尚  
書顥游擊將軍領著作郎兼尚書左丞徐爰誠心內  
款參聞嘉策匡贊之効寔監朕懷宜甄茅社以獎義



梁顛可封新隆縣子爰可封吳平縣子食邑各五百

戶

敕巢尚之

戴法興會稽山陰人世祖時為中書通事舍人意任隆密凡遷選誅賞皆與法興尚書參懷廢帝即位法興遷越騎校尉執權日久威行內外然頗以直言忤上於家賜死敕尚之

吾纂承洪基君臨萬國推心勲舊著于遐邇不謂戴法興待遇負恩專作威福冒憲黷貨號令自由積釁累愆遂至於此卿等忠勤在事吾乃具悉但道路之言異同糾紛非惟人情駭愕亦玄象違度委付之旨良失本懷吾今自親覽萬機留心庶事卿等宜竭誠

盡力以副所期 宋書



宋文紀卷第四

晉陽張煊

燕中周維新

訂閱江東梅鼎祚纂輯

明帝

名彧字休炳文帝第十一子封湘東王為廢帝所幽弒帝自立在位八年廟號太宗

追崇江夏王義恭令書

義恭為廢帝在殺太宗定亂令書

故中書監太宰領太尉錄尚書事江夏王道性淵深

睿鑒通遠樹聲列藩宣風鉉德位隆姬輔任屬負圖

勤勞國家方熙託付之重盡心毗導永融雍睦之化

而凶醜忌威奄加冤害夷戮有暴殞窆無聞憤達幽

明痛貫朝野朕蒙險在難含哀莫申幸賴祖宗之靈



克纂祈天之祚仰惟勲戚震慟于厥心昔梁王徵庸  
警蹕備禮東平好善黃屋在廷况公德猷弘懋彝典  
未殊者哉可追崇使持節侍中都督中外諸軍事丞  
相領太尉中書監錄尚書事王如故

路休之拜官令書

太宗廢幼主欲陰路太后之心乃下令書時未即位

太皇太后蚤垂愛遇沿情即事同於天屬前車騎參  
議參軍路休之前丹楊丞路茂之崇憲密戚蚤延榮  
貫並懷所勲宜殊恒飭休之可黃門侍郎領步兵校  
尉茂之可中書侍郎

追贈柳元景令

元景謀廢立為前廢帝所誅太宗即位下令

故侍中尚書令驃騎大將軍巴東郡開國公新除開  
府儀同三司南豫州刺史元景風度弘簡體局深沉  
正義亮時恭素範物幽明道盡則首贊孝圖盛運開  
曆則毗燮皇化方任乎漢輔業懋殷衡而蜂豺肆濫  
顯加禍毒冤動勲烈悲深朝貫朕承七廟之靈纂臨  
寶業情典既申痛悼彌軫宜崇賁徽冊以旌忠懿可  
追贈使持節都督南豫江三州諸軍事太尉侍中刺  
史國公如故

即位改元詔

泰始元年十二月即景和元年冬

高祖武皇帝德洞四瀛化綿九服太祖文皇帝以大



明定基世祖孝武皇帝以下武寧亂日月所照梯山  
航海風雨所均削衽襲帶所以業固盛漢聲溢隆周  
子業凶嚚自天忍悖成性人面獸心見於髻日反道  
敗德著自比年其狎侮五常怠棄三正矯誣上天毒  
流下國寔開闢所未有書契所未聞再罹遏密而無  
一日之哀齊斬在躬方深北里之樂虎兕難匣馮河  
必彰遂誅滅上宰窮豐逆之酷虐害國輔究孥戮之  
刑子鸞同生以昔憾殄殪敬猷兄弟以睚眦殲夷徵  
逼義陽將加屠膾陵辱戚藩櫝楚妃主奪立左右竊  
子置儲肆凶于朝宣淫于國事穢東陵行汗飛走積  
豐罔極日月滋深比遂圖犯玄宮志窺題湊將肆梟  
獍之禍騁商頓之心又欲鴆毒崇憲虐加諸父事均  
宮闈聲遍國都鴟梟小豎莫不寵暱朝廷忠誠必加  
戮挫收掩之旨虓虎結轍掠奪之使白刃相望百僚  
危氣首領無有全地萬姓崩心妻子不復相保所以  
鬼哭山鳴星鉤血降神器殆於馭索景祚危於綴冕  
朕假寐凝憂泣血待旦慮大宋之基於焉而泯武文  
之業將墜于淵賴七廟之靈藉八百之慶巨猾斯殄  
鴻沴時褰皇綱絕而復紐天緯缺而更張猥以寡薄  
屬承乾統上緝三光之重俯顧庶民之艱業業矜矜



若履冰谷思與億兆同此維新可大赦天下改景和  
元年爲泰始元年賜民爵一級鰥寡孤獨不能自存  
者穀人五斛逋租宿債勿復收犯鄉論清議賊污淫  
盜並悉洗除長徒之身特賜原遣亡官失爵禁錮舊  
勞一依舊典其昏制謬封並皆刊削

分遣大使詔

元年十一月  
二月

朕戡亂寧民屬膺景祚鴻制初造革道維新而國故  
頻罹仁澤偏壅每寤寐疚心罔識攸濟巡方問俗弘  
政所先可分遣大使廣求民瘼考守宰之良採衡閭  
之善若獄犴淹枉傷民害教者具以事聞鰥寡孤獨  
癯殘六疾不能自存者郡縣優量賑給貞婦孝子高  
行力田許悉條奏務詢輿誦廣納嘉謀每盡皇華之  
旨俾若朕親覽焉

減省大官御府詔

元年

皇室多故糜費滋廣且久歲不登公私歎弊方刻意  
從儉弘濟時艱政道未孚慨愧兼積大官供膳可詳  
所減撤尚方御府雕文篆刻無益之物一皆蠲省務  
存簡約以稱朕心

有司詳立科品寬惠詔

二年十一月  
其日又詔

治崇簡易化疾繁侈遠觀隆替明著軌跡者也朕拯



斯墜運屬此屯極仍之以凋耗因之以師旅而識昧  
前王務艱昔代俾夫舊賦既繁爲費彌廣寤寐萬務  
每思弘革方欲緩繇優調愛民爲先有司詳加寬惠  
更立科品其方物職貢各順土宜出獻納貢敬依時  
令凡諸蠹俗妨民之事趣末違本之業雕華靡麗竒  
噐異技並嚴加裁斷務歸要實左右尚方御府諸署  
供御制造咸存儉約庶淳風至教微遵太古阜財興  
讓少敦季俗

又詔

矢機詢政立教之攸本舉賢聘逸弘化之所基故負  
鼎進策殷道以康釋釣作輔周祚斯又朕甫承大業  
訓道未敷雖側席忠規竚夢巖築而良圖莫薦奇士  
弗聞求鑒通古無忘宵寐今藩隅克晏敷化維始屢  
懷存治寔望箴闕王公卿尹羣僚庶官其有嘉謀直  
獻匡俗濟時咸切事陳奏無或依隱若乃林澤貞栖  
丘園耿潔博洽古今敦崇孝讓四方在任可明書搜  
揚具即以聞隨就褒立

原蕩衆藩從亂詔

二年十月

近衆藩從亂多染豐科或誠係本朝事緣逼迫混同  
證錮良以悵然夫天道尚仁德刑並用雷霆時至雲



雨必解朕眷言靜念思弘風澤凡應禁削皆從原蕩  
其文武堪能隨才銓用

衡虞科制詔

三年八月

古者衡虞置制蠲蚘不收川澤產育登噐進御所以  
繁阜民財養遂生德頃商販逐末競早爭新折未實  
之菓收豪家之利籠非膳之翼爲戲童之資豈所以  
還風尚本捐華務實宜修道布仁以革斯蠹自今鱗  
介羽毛肴核衆品非時月可採噐味所須可一皆禁  
斷嚴爲科置

大赦詔

三年八月

法網之用期世而行寬惠之道因時而布况朕尚德  
戡亂依仁馭俗且每就弘簡以隆至治而頻罹兵革  
繇賦未休軍民巧僞興事甚多蹈刑入憲諒非一科  
至乃假名戎伍竊爵私庭因戰散亡託懼逃役且往  
諸淪逼雖經累宥逋竄之黨猶爲寔繁宵言未懷良  
兼矜疚思所以重播至澤覃被區宇可大赦天下

欽刑詔

四年九月

夫愆有大小憲隨寬猛故五刑殊用三典異施而降  
辟次網便暨鉗撻求之法科差品滋遠朕務存欽卹  
每有矜貸尋創制科罪輕重同之大辟即事原情未



爲詳衷自今凡竊執官仗拒戰邏司或攻剽亭寺及  
害吏民者凡此諸條悉依舊制五人以下相逼奪者  
可特賜黯肘投昇四遠仍用代殺方古爲優全命長  
戶施同造物庶簡惠之化有孚羣萌好生之德無漏  
幽品

羣司舉隱逸詔

五年九月

夫箕穎之操振古所貴冲素之風哲王攸重朕屬橫  
流之會接難晦之辰龕暴翦亂日不暇給今雖關隴  
猶靄區縣澄氛偃武修文於是乎在思崇廉恥加靜  
馳薄固已物色載懷寢興竚歎其有貞栖隱約自事

衡樊鑿坏遺榮負鈞辭聘志恬江海行高塵俗者在  
所精加搜括時以名聞將貢園矜德茂昭厥禮羣司  
各舉所知以時授爵

郊祀詔

泰始二年十一月下詔有司奏檢未有  
先准黃門侍郎徐爰議建安王休仁等  
同爰議參議  
爲允詔可

朕載新寶命仍離多難戎車遄駕經略務殷禋告雖  
備弗獲親禮今九服既康百祀咸秩宜聿遵前典郊  
謁上帝

黃門侍郎徐爰議

虞稱肆類殷述昭告蓋以創世成功德盛業遠開統



肇基必享上帝漢魏以來聿遵斯典高祖武皇帝克  
伐僞楚晉安帝尚在江陵即於京師告義功於郊祀  
伏惟太始應符神武英斷王赫出討戎戒淹時雖司  
奉弗虧親謁尚闕謹尋晉武郊以二月晉元禋以三  
月有非常之慶必有非常之典不得拘以常祀限以  
正月上辛愚謂宜下史官考擇十一月嘉吉車駕親  
郊奉謁昊天上帝高祖武皇帝配饗其餘祔食不關  
今祭

詳議郊享明堂詔

泰始六年詔前兼曹郎虞愿

議謂間歲爲允緣諮參議並  
同曹郎王延秀重議通關八座同延秀議後  
廢帝元徽二年有司奏郊祀明堂同日間歲

古禮王者每歲郊享爰及明堂自晉以來間年一郊  
明堂同日質文詳略疎數有分今可間二年一郊間  
歲一明堂外可詳議

兼曹郎虞愿議

郊祭宗祀俱主天神而同日殷薦於義爲黷明詔使  
圓丘報功三載一享明堂配帝間歲昭薦詳辰酌衷  
寔允懋典

曹郎王延秀議

改革之宜寔如聖旨前虞愿議蓋是仰述而已未顯  
後例謹尋自初郊間二載明堂間一年第二郊與第



三明明堂還復同歲愿謂自始郊明堂以後宜各間二年以斯相推長得異歲

定制車服議秦始四年

車服之飾象數是遵故盛皇留範列聖垂制朕近改定五路酌古代修成六服沿時變禮所施之事各有條叙便可付外載之典章朕以大冕純玉纁玄衣黃裳乘玉輅郊祀天宗祀明堂又以法冕五綵纁玄衣絳裳乘金輅祀太廟元正大會諸侯又以飾冠冕四綵纁紫衣紅裳乘象輅小會宴饗餞送諸侯臨軒會王公又以肅冕三綵纁朱衣裳乘革路征伐不賓

講武校獵又以宏冕二綵繒青衣裳乘木輅耕稼饗國子又以通天冠朱紗袞為聽政之服

報奏路太后別居外宮詔明帝少失所生為后撫養及踐祚號崇憲

太后有司奏請別居詔不許

朕備丁艱罰蚤嬰孤苦特蒙崇憲太后聖訓撫育昔在蕃闈常奉藥餌中迫凶威抱懷莫遂今泰運初啓情典獲申方欲親奉晨昏盡歡閨禁不得如所奏

有司崇憲太后別居外宮奏

夫德敷於內典章必遠化覃於外徽號宜宣伏惟皇太后懿聖自天母儀允著義明八遠道變九圍聖明



文系 卷四 九  
登御景祚攸改皇太后宐即前號別居外宮

路太后服總詔

朕幼集荼蓼夙憑德訓龕越定業寔資仁範恩著屯夷有兼常慕夫禮沿情施義循事立可特齊衰三月以伸追仰之情

路太后遷殯詔

太后葬世祖陵東南號脩寧陵先是晉安王子勛未卒巫者謂宜開太后陵以為厭勝脩復倉卒泰始四年詔有司奏可

崇憲昭太后脩寧陵地大明之世久所考卜前歲遭諸蕃之難禮從權宜奉營倉卒未暇營改而塋隧之所山原卑陋頃年積壞日有滋甚恒費修整終無永

固宜詳考地形殊乖相勢朕蚤蒙慈遇情理兼常思使終始之義載彰幽顯史官可就巖山左右更宅吉地明審龜筮須選令辰式遵舊典以禮抑制今中寓雖寧邊虜未息營就之功務在從簡舉言尋悲情如切割

有司奏 詔可

北疆未緝戎役是務禮之詳略各沿時宜臣等叅議脩寧陵玄宮補治毀壞權施油殿暫出梓宮事畢即寔於事為允

黜晉熙太妃謝氏詔

義陽王昶文帝第九子為徐州刺史景和中廢帝欲



討誅之起兵不捷弃母妻奔魏遺妾生二子  
並以太妃不慈天卒泰始六年太宗以皇子  
燮繼初改相封  
晉熙王乃下詔

夫虎狼獲子猴獾負孫毒牲薄情亦有仁愛故識忘  
氣類尚均羣品况在人倫可忘天屬晉熙太妃謝氏  
沉刻無親物理罕比征北公雖孝道無替而遭此不  
慈自少及長闕恩鞠之■乃至休否莫關寒温不訪  
晨昏屏塞定省靡因事無違忤動致誚責毒句發口  
人所難聞加惡備苦過于離隙遂事憤於宗姻義傷  
於行路公故妃郗氏婦禮無違逢此嚴酷遂以憂卒  
用天盛年又謝氏食則豐珍衣則文麗奉已之餘播

覃群下而諸孫續不温體食不充飢付于姆妳之手  
縱以任軍之路遇其所生弃若糞土縑縷比于重囚  
窮困過於下使誠皇規方遠沙塞將一公脩短不諱  
亦難豫圖兼妾女累弱一第領主防閑之道人理斯  
急朕所以詔第六子燮奉公為胤欲以毗整一門為  
公繼紹但謝氏待骨肉至親尚相弃蔑况以義合免  
苦為難患萌防漸危機須斷便可還其本家削絕蕃  
秩

降廬江王禕詔

泰始五年河東柳欣慰謀反欲  
立禕要結征北諮議參軍杜幼

文左軍將軍宋祖珍前郡令王隆伯禕與相  
訓贈三人具奏其事上乃下詔出禕鎮宣城



尋遣使逼  
令自殺

昔周室既盛二叔流言漢祚方隆七蕃迷叛斯寔事  
彰往代難興自古雖聖賢御寓寓內紆患太尉廬江  
王藉慶皇枝蚤升寵樹幼無立德長缺脩聲淡薄親  
情厚結行路狎昵羣細疏澁人事自朕撥亂定宇受  
命應天寔尚敦睦克敷友士故崇殊爵超居上台而  
公常懷不平表於事迹公若德深望重宜膺大統朕  
初平暴亂豈敢當壁自立惟符奉璽天祚有歸且朕  
雖居尊極不敢自持宗室之事無不諮公不虞志欲  
難滿安生窺怨積慝在衿遂謀社稷曩者四防邁禍

兵斥畿甸搢紳憂惶親賢同憤唯公獨幸厥灾深扞  
時難晝則從禽遊肆夜則縱酒弦歌側耳視陰企賊  
休問司徒休仁等並各令弟事兼家國摧鋒履險各  
伐一方蒙霜踐棘辛勤已甚况身被矢石否泰難虞  
悠悠之人尚有信分公未曾有一函之使遺半紙之  
書志棄五弟以餌讎賊自謂身非勲烈義不叅謀必  
期凶逆道申以圖輔相及皇威既震羣凶蕭蕩九有  
同慶萬國含欣而公容氣更沮下帷晦迹每覘天察  
宿懷協左道呪詛禱請謹事邪巫常被髮跣足稽首  
北極遂圖畫朕躬勒以名字或加之矢刃或烹之鼎



鑊公在江州得一漢女云知吉凶能行厭呪大設供養朝夕拜伏衣裝嚴整敬事如神令其祝詛孝武并及崇憲祈皇室危弱統天稱已巫稱神旨必得如願後事發覺委臯所生微幸敝隘僅得自免近又有道士張寶爲公見信事既彰露肆之于法公不知慙懼猶加營理遣左右二人主掌殯舍顯行邪志罔顧吏司又挾閹豎陳道明交關不逞傳驛音意投金散寶以爲信誓又使府史徐虎兒招引邊將要結禁旅規害台輔圖犯宮掖公受性不仁才非治用昔忝江州無稱被徵前莅會稽以臯左黜公稽古寡聞嚴而無理言不暢寒暑惠不及惟房朝野所輕摺紳同侮豈堪輔相之地寧任莅民之職非唯一朝有自來矣大明之世迄于永光公常留中未嘗外撫何以在今方起嫌怨公少即長人情無哀戚侍拜長寧從祀宗廟顏無戚狀淚不垂臉兄弟長幼靡有愛心昔因孝武御筵置酒心誠不著于時義陽念遇本薄遭公此譖益被猜嫌朕當時狼狽不暇自理賴崇憲太后譬解百端少蒙申亮得免殃責景和狂主醜毒橫流初誅宰輔豺志方扇于建章宮召朕兄弟逼酒使醉公因酒勢遂肆苦言云朕及休仁與太宰親數往必清閑



贈貺豐厚朕當時惶駭五內崩墜于其語次劣得少  
止往又經在尋陽長公主第兄弟共集忽中坐忿怒  
厲色見指以朕行止出入每不能固若得稱心規肆  
忿憾惟公此旨蚤欲見滅而天道受善朕獲南面不  
長惡逆挫公毒心自大明積費國弊民凋加景和奢  
虐府藏罄盡朕在位甫爾卹義具瞻仍值中阻蜂起  
日耗萬金公卿庶民傾產歸獻積受台奉貲畜優廣  
朕踐阼之初公請故太宰東傳餘錢見入數百萬內  
不充養外不助國散賜諂諛徧惠趨隸推心考行事  
類斯比羣小交構遂生異圖籍籍之議轉盈民口公

若地居衡寄任專八柄德育於民勲高於物勢不自  
安於事爲可公既才均櫟木牽以曲全因高無民得  
守虛靜而坐作凶咎自深釁由朕誠感無素爰至

於此求尋多難惋慨寔深凡人所行各有本志朕博  
愛尚仁爲日已久尚能含讎恕辜著于觸事豈容于  
公不相隱忍但禍萌易漸去惡宜疾負荷之重寧得  
坐觀且蔓草難除燎火須撲狡扇之徒宜時誅剪已  
詔司戮肅正典刑公身居戚長情禮兼至準之常科  
顧有惻怛宜少申國憲以弔不臧今以淮南宣城歷  
陽三郡還立南豫州降公爲車騎將軍開府儀同三



司南豫州刺史削邑千戶待中王如故

與建安王休仁書休仁文帝第十二子

太宗即位休仁為司徒尚書令揚州刺史尋諸方逆命休仁出據虎檻進據浙摠統諸軍隨宜應接中流平定休仁之力也初行與蘇侯神結為兄弟以求神助事平與休仁書

此段殊得蘇侯兄弟力南史此段殊得蘇侯神力○蘇侯晉叛將蘇峻也宋齊間

祀之每事多祈于蔣侯子文及蘇侯

與建安王休仁詔

廬江王瑋字休秀文帝第八子為太尉尤凡劣諸兄弟唾鄙之太宗與休仁詔後坐悖怨殺自

人既不比數西方公汝便為諸王之長時瑋住西州故謂西方公

誅建安王休仁詔廢帝狂悖忌憚諸父並囚之

徒尚書令揚州刺史休仁與太宗夙相愛友及廢帝世同經危難泰始初四方逆命兵至近畿休仁親當矢石大勲克建任摠百揆朝野輻輳上漸不悅因慮諸弟彊盛太子幼弱齎藥賜死乃下詔有司奏絕屬籍見息徙遠郡并治邢太妃詔報又與諸方鎮大臣詔

夫無將之誅諒惟通典知咎自引寔有偏介劉休仁

地屬密親位居台重朕友寄特深寵秩兼茂不能弘

贊國猷禪宣政道而自處相任妄生猜嫌側納羣小

之說內懷不逞之志晦景祕迹無事陽愚因近疾患

沉篤內外憂悚休仁規逼禁兵謀為亂逆朕曲推天

倫未忍明法申詔誥礪辨覈事原休仁慙恩懼罪遽



文系 牙卷四 十五  
自引決追尋悲痛情不自勝思屈法科以伸矜悼可  
宥其二子并全封爵但家國多虞豐起台輔永尋既  
往感慨追深

有司奏

臣聞明罰無親情屈於司綱國典有經威申於義滅  
是以梁趙之誅跣出稱過來言之罰克入致動謹案  
劉休仁苞蓄禍迹事蔽于天明竄匿沉姦情宣于民  
聽自以屬居戚近早延恩睦異禮殊義望越常均往  
歲授鉞南討本非才命啓行濃湖特以親攝仰遵廟  
略俯藉衆效屬承泰運竊附成勲而亟叨天功多自  
臧伐既聖明御寓躬覽萬機百司有紀官方無越而  
休仁矜勲怙貴自謂應摠朝權遂妄生疑難深自猜  
外故司空晉平刺王休祐少無令業長滋貪暴歷任  
陝荆流毒西夏編戶嗟散列邑雕虛聖澤含弘未明  
正憲亟與休仁論其愆迹辭意既密不宜傳廣遂飭  
容旨反相勸激休祐以休仁位居朝右任遇優崇必  
能爲已力援故深相黨結休祐於是輸金薦寶承顏  
接意造剝之間必論朝政遂無日不俱行無時不同  
宿聲酣聚集密語清閑休仁含姦扇惑善於計數說  
休祐使外託專慎之法密行貪詐之心謂朝廷不覺



人莫之寤休祐遂乃外積怨懼內協禍心既得贊激  
凶慝轉熾與休仁共爲姦謀潛伺機隙圖造釁變規  
肆凶狡休仁致殞倉卒寔維天誅而晉平國太妃妾  
邢不能追慙子惡上感曲恩更懷不逞巫蠱呪詛休  
仁因聖躬不和猥謀姦逆滅道反常莫斯爲甚殛肆  
朝市庶申國刑而法網未加自引厥命天慈矜厚減  
法崇恩賜全二息及其爵封斯誠弘風曠德貫絕通  
古然非所以棄惡流釁懲懼亂臣者也臣等參議謂  
宜追降休仁爲庶人絕其屬籍見息悉徙遠郡休祐  
愆謀始露亦宜裁黜徙削之科一同舊準收邢付獄

依法窮治

又詔報

邢匹婦狂愚不足與計休仁知釁自引情有追傷可  
特爲降始安縣王食邑千戶并停伯融等流徙聽襲  
封爵

詔諸方鎮大臣

休仁致殞卿未具悉事之始末今疏以相示休祐貪  
恣非政法網之所不容昔漢梁孝王淮南厲王無它  
釁恃正以越漢制度耳况休祐吞爵聚斂爲西數州  
之蝗取與鄙虐無復人情屢得王景文褚淵沈攸之



等啓陳其辜惡轉不可容吾篤兄弟之恩不欲致之以法且每恨大明兄弟情薄親見休祐屯苦之時始得寬寧彌不忍問所以改授徐州冀其去朝廷近必應能自悛革及拜徐州未及之任便徵動萬端暴濁愈甚既每爲民蠹不可復全休仁身羸有知解兼爲宰相又吾與其兄弟情昵特復異常頗與休仁論休祐釁狀休祐以休仁爲吾所親必應知吾意又云休仁言對能爲損益遂多與財賂深相結事乃寢必同宿行必共車休仁性軟易感說遂成繾綣共爲一家是吾所吐密言一時倒寫吾與休仁少小異常惟虛

心信之初不措疑雖爾猶慮清閒之時非意脫有聞者吾近向休祐推情戒訓嚴切休祐更不復致疑休祐死後我將其內外左右問以情狀方知言語漏泄并具之由彌日懊惋心神萎孰休仁又說休祐云汝但作佞此法自足安我常乘許爲家從來頗得此力但試用看有驗不休祐從之於是大有獻奉言多乖實積惡自不可恕自休祐殞亡之始休仁款曲共知休仁旣無辜釁主相本若一體吾之推意初無有間休祐貪愚爲天下所疾致殞之本爲民除患兄弟無復多人彌應思弔不咸益相親信休祐平生狼抗無



賴吾慮休仁往哭或生崇禍且吾爾日本辦仗往哭  
晚定不行吾所以爲設方便呼入在省而休仁得吾  
召入大自驚疑遂入辭揚太妃顏色狀意甚與常異  
既至省揚太妃驟遣監子去來叅察從此日生嫌懼  
而吾之推情初不疑覺從休祐歿後吾再幸休仁第  
飲噉極日排閣入內初無猜防休仁坐生嫌畏一日  
吾春中多期射雉每休仁清閒多往雉場中或救使  
陪輦及不行日多不見之每值宵休仁輒語左右云  
我已復得令一日及在房內見諸妓妾恒語我云不  
知朝夕見底若一旦死去作鬼亦不取汝取汝正是  
亂人耳休祐歿時日已三晡吾射雉始從雉場出休  
仁從騎左右伏野中吾遣人召之稱云腹痛不堪騎  
馬爾時諸王車皆停在朱雀門裏日既暝不暇遠呼  
車吾衣書車近在離門裏敕來下油幢絡呼擬以載  
之吾由來諳悉其體有冷患聞腹痛知必是冷乃敕  
太醫上省送供御高粱薑飲以賜之休仁得飲忽大  
驚告左右稱敗今日了左右荅曰此飲是御師名封  
題休仁乃令左右先飲竟猶不甚信乃僂俛啗之裁  
進一合許妄先嫌貳事事如是由來十日五日一就  
問太妃自休祐死後每吾詔必先至揚太妃間如分



別狀休仁由來自營府國興生文書二月中史承祖齋文書呈之忽語承祖云我得成許那何煩將來吾虛心如舊不復見信既懷不安大自憊恐惟以情理不容復有善心休仁既經南討與宿衛將帥經習狎共事相識者布滿外內日常出入于廂下經過與諸相識將帥都不交言及吾前者積日失適休仁出入殿省諸衛主帥裁相悉者無不和顏厚相撫勞爾時吾既甚惡意不欲見外人悠悠所傳互言差劇休仁規欲聞知方便使曇度道人及勞彥遠屢求啓闕覘吾起居及其所啓皆非急事吾意亦不厝疑吾與休仁親情實異年少以來恒相追隨情向大趣亦往往多同難否之日每共契闊休仁南討爲都統既有勲績狀之於心亦何極已但休仁於吾望既不輕小人無知亦多挾背向既生猜貳不復自寧夫禍難之由皆意所不悟如其意趣人莫能測事不獲已反覆思惟不得不有近日處分夫于兄弟之情不能無厚薄休祿之亡雖復悼念猶可以理割遣及休仁之殞悲愍特深千念不能已已舉言傷心事之細碎既不可曲載詔文恐物不必卽解兼欲存其兒子不欲窮法爲詔之辭不得不云有兵謀非事實也故相報卿知



楊太妃者休  
仁母楊脩儀

報巴陵王休若

休若文帝第十九子  
歷江州刺史賜死

晉平王休祐文帝第十三子為驃騎大將軍  
荆州刺史歷從南徐州佷戾疆梁前後忤上  
非一太宗因從射雉遣壽寂之等於路拉殺  
之託言墜馬時休若在江陵其日馳信報之

吾與驃騎南山射雉驃騎馬驚與直閣夏文秀馬相

踰文秀墮地驃騎失鞍馬驚觸松樹墮地落礪中時

頓悶不識人故馳報弟

馬驚南史作馬重  
驚○此或口詔

又

休若為雍州刺史進衛將軍典籤夏竇期事  
休若無禮啓太宗誅之未報輒于獄行刑上  
大怒與休若書降號  
左將軍削封五百戶

孝建大明中汝敢行此耶

孝建大明並  
孝武帝年號

與驃騎大將軍桂陽王休範書

休範  
見後

太宗以休若和善能諧緝物情偽遷為江州  
刺史徵還召拜手書殷勤即賜死與休範書

外間有一師姓徐名紹之狀如狂病自去為塗步即

所使云三月中忽云神語道巴陵王應作天子汝使

巴陵王密知之於是師便訪覓休若左右人不能得

東宮典書姓何者相識數去來師解神語東宮典書

具道神語東宮典書答云我識巴陵間一左右當為

汝向道數日東宮典書復來語師云我已為汝語巴

陵左右道因達巴陵巴陵具知云莫聲但聽又頃者



史官奏天文占候頗云休若應挾異端神道茫昧乃不可全信然前後相准略亦不無髣髴且帖肆間自大明以來有若好之謠于今未止詔若首重章句皆配以美辭美事諸不逞之徒咸云必是休若休若且知道路有異音里巷有若好之謠在西已竒懼致王敬先吐猖狂之言近休祐休仁被誅休若彌不自安又左右多是不相當負罪之徒恒說以道路之言叩動之相與唱云萬民之心屬在休若感激其意尋休若從來心迹殊有可嫌劉亮問高次祖汝一應識此人當給休若休若在東縱恣羣下無本末還朝被貶爵

位小退次祖被亮使歸過問訊大泣語次祖云我東行是一段功在郡橫爲群小輩過失大被貶降我實憤怨不解劉輔國何意不作次祖答云劉輔國蒙朝廷生成之恩豈宜有此理推此已是有竒意吾使諸王在蕃正令優游而已本不以武事而休若在西廣召弓馬健兒都不啓聞又戾道明等昔親爲賊罪應萬死休若至西大信遇之乃潛將往不啓京吾知汝意謂休若處奉因事事何如心迹既不復可測因其還朝在弟與書事事詰誚於內許密自引分狀如暴疾致故差得於其名位及兒子悉得全也休若既是



汝弟使其狼心得申者汝得守冶城邊作太尉公耶  
非但事關計亦於汝甚切汝可密白荀太妃令知

王律昔在西州故上云冶城邊荀太妃休範母○百重下一有章字

徙松滋侯子房詔子房孝武帝第六子初封尋陽王太宗即位由會稽太守

徵為撫軍領太常長史孔顛舉兵應晉安王子助事敗見囚貶為松滋侯路休之等以崇

憲太后崩不自安劉祗在南兗州嚴龍宿為世祖所委信至是並懷異圖故下詔并誅之

不虞之釁著自終古情為法屈聖達是遵朕埽穢定

傾再全寶業速惟鴻基猥當負荷思弘治道務盡敦

睦而妖豎邁扇安造異圖自西南阻兵東夏侵斥都

邸群凶密相唇齒路休之兄弟專作謀主規興禍亂

令舍人嚴龍覘覩宮省以羽林出討宿衛單罄候隙

伺間將謀竊發劉祗在蕃規相應援通言北寇引令

過淮頃休範濟江潛欲拒捍賴卜祚靈長姦回弗逞

陰慝已露宜盡憲辟寔以方難未夷曲加遵養今王

化帖泰宜辨忠邪涓流不壅燎火難滅便可委之有

司速正典刑松滋侯子房等淪陷逆徒協同醜悖遂

與籤帥羣小潛通南釁連結祗等還圖朕躬雖咎度

已彰在法無宥猶子之情良所未忍可廢為庶人徙

付遠郡

追贈新安王子鸞等詔子鸞孝武帝第八子以母殷貴妃有寵愛冠諸



子為前廢帝所殺  
太宗即位下詔

夫紆冤申痛雖往必追緣情惻愛感事彌遠故使持節都督南徐州諸軍事撫軍將軍南徐州刺史新安王子鸞夙表成器蚤延殊寵方樹美業克光蕃維而凶心肆忌奄罹橫禍興言未傷有兼常懷宜於天秀以雪沉魂可贈使持節侍中都督南徐兗二州諸軍事司徒南徐州刺史王如故第十二皇女第二皇子子師俱嬰謬酷有增酸悼皇女可贈縣公主子師復先封為南海王並加徽謚

又為新安王子鸞立嗣詔

哀遠追往仁道所弘興滅繼絕盛典斯貴朕務古思治恩禮必敷異族猶敦况在近戚故新除使持節侍中都督南徐兗二州諸軍事司徒南徐州刺史新安王子鸞年雖冲弱性識早茂鍾慈世祖冠寵列蕃值景和凶虐橫罹酷禍國胤無主冤祀莫寄尋念痛悼夙軫于懷可以建平王景素息延年為嗣

世祖封第九子智隨為武陵王詔

改名贊  
字仲敷

世祖孝武皇帝雖恃尊僮惠勳狹政弛樂飲無饜事因於寧泰任威縱費義緣于務寡故以積怨動天流殃胤嗣景和肇釁義嘉成禍世祖繼體陷憲無遺昔



皇家中地含生懼滅賴英孝感奮掃雪冤恥勲績隆  
歷拯茲窮氓繼絕追遠禮訓攸尚况既帝且兄而缺  
斯典今以第九子智隨奉世祖為子武陵郡大明之  
世事均代邦可封智隨武陵王食邑五千戶尋世祖  
一門女累不少既無釐摠義須防閑諸侯雖不得祖  
稱天子而事有一家之切且歸寧有所疹疾相營得  
失是任閨房有稟朕應天在位恩深九族庶此足申  
追睦之懷敷愛之旨

手詔譬袁顛

顛字景章陳郡陽夏人

顛前廢帝時歷遷吏部尚書俄而寵衰自慮及禍詭辭求出領寧蠻校尉雍州刺史至

陽修繕器械纂集士卒反意已定會太宗定大事進顛號右將軍顛詐稱被太宗太后令起兵奉表勸晉安王子勛即位太宗使朝士與顛書顛本無將畧又信往來之言京師米貴斗錢數百以為不勞攻伐行自離散於是擁甲以待太宗使顛舊門生徐碩奉手詔譬之又使朝士與顛書並不聽兵敗見殺

卿歷觀古今嶮之與彊何嘗可恃自朕踐阼塗路梗  
塞卿無由奉表未經為臣今追蹤竇融猶未為晚也

南史作獨未晚也

詔沈文秀

文秀字仲遠吳興武康人

太宗已定亂晉安王子勛據尋陽反文秀為青州刺史薛安都勸令同逆上遣其弟文炳詔文秀文秀歸命請臯即安本任號輔國將軍為虜所殺



皇帝問前督青州徐州之東莞東安二郡諸軍事建威將軍青州刺史朕去歲撥亂功振普天於卿一門特有殊澤卿得延命至今誰之力耶何故背國負恩遠同逆豎今天下已定四方寧一卿獨守窮城何所歸奉且卿百口在都兼有墳墓想情非木石猶或顧懷故指遣文炳具相宣示凡諸逆節親為戎首一不加臯文炳所具卿獨何人而能自立便可速率部曲同到軍門別詔有司一無所問如其不爾國有常刑非惟戮及弟息亦當夷卿墳壠既以謝齊土百姓亦以勞將士之心故有今詔

追贈范道興等詔

晉安王子勛之亂前軍典籤范道興志不同逆為鄧琬所

殺其餘奉順見害者並為上所愍詔贈有司復奏張興世等封各有差

前鎮軍叅軍督護范道興朕之舊隸經從北藩徒役南畿遭離命會抱恩固節受害羣凶言念純誠良可閔愴可贈員外散騎侍郎南城令鮑法度後軍典籤馮次民永新令應生新建令軍延寶上饒令黃難等違逆識順同被誅滅言念既往宜在追錄可贈生奉朝請法度南臺御史次民延寶難並員外將軍

顏奐擢中書侍郎詔

奐為延之第三子延之先領太宗湘東王師即位下







又詔

法興小人專權豪恣雖虐主所害義由國討不宜復貪人之爵封爵可停

徐爰徙交州詔

爰長於附會又飾以典文自太祖世祖以逮前廢帝並所任遇

太宗在蕃不說及景和世太宗屈辱卑約爰禮敬甚簡益銜之泰始三年詔徙交州既行

又詔

夫事君無禮教道弗容訕上衒已入倫所棄太中大夫徐爰拔迹廝猥推席饗逢遂官叅時望門伍豪族遷位轉榮莫非超荷而諂側傾險與性自俱利口讒安自少及長奉公任事釐豪蔑聞初無愧滿常有闕

進先朝賞以芻輩之中粗有學解故得漸蒙驅策出入兩宮太初偽立盡心佞事義師已震方得南奔及孝武居統唯極諂諛附會承旨專恣厥性致使政治苛縱興造乖法損德害民皆由此豎景和悖險深相贊協苟取偷存罔顧節義任筭設數取合人主啟嘔姦矯所志必從故歷事七朝白首全貴自以體含德厚識鑑機先迷塗遂深罔知革悟朕撥亂反正勲濟天下靈祇助順羣逆必夷况爰恩養而無輸效遂內挾異心著于形迹陽愚杜口罔所陳聞惰事緩文庶申詭畧當今朝列賢彥國無佞邪而秉心弗純累壽



時政以其自告之辰用賜歸老之職榮禮優崇寧非  
饗過不謂潛怨席外進競不已勤言託意觸遇斯發  
小人之情雖所先照猶許其當改未忍加法遂恃朕  
仁弘必求容貸昨因觴宴肆意譏毀謂制詔所爲皆  
資傍說又宰輔無斷朝要非才恃老與舊慢戾斯甚  
此邊難未靜安衆以惠戎略是務政綱從簡故得使  
此小物乘寬自縱乃合投畀豺虎以清王猷但朽頽  
將盡不足窮法可特原罪徙付交州

又除廣州統內詔

八議緩罪舊在一條五刑所抵者必加貸徐爰前後

釁迹理無可申廢棄海堦寔允國憲但蚤蒙朕識曲  
矜愚朽既經大宥思沾殊渥可特除廣州統內郡

徙沈勃詔

勃爲演之次子好文章善彈琴圍碁  
泰始中爲太子右衛率加給事中時

欲北討使勃還鄉募人  
多受貨賄上怒下詔

沈勃琴書藝業口有美稱而輕躁耽酒幼多罪愆比  
奢淫過度妓女數十聲酣放縱無復劑限自恃吳興  
士豪比門義故脅說士庶告索無已又輒聽募將委  
役還利託注病叛遂有數百周旋門生競受財貨少  
者至萬多者千金考計贓物二百餘萬便宜明罰敕  
法以正典刑故光祿大夫演之昔受深遇忠績在朝



尋遠矜懷能無弘律可徙勃西垂令一思愆悔

手詔劉懷珍

字道玉平原人入齊歷散騎常侍安北將軍

建平王景素為荊州徙懷珍右軍司馬遷南郡太守加寧朔將軍明帝手詔懷珍奉旨

卿性忠謹平所仗賴在彼與年少共事不可深存受

益景素兒乃佳但不能接物頗亦墮事卿每諫之

寢疾又詔

明帝崩乃為安成王撫軍司馬

卿不應乃作景素佐才舊所寄今徵卿叅二衛直

南齊

書

詔沈攸之

攸之見後

攸之為前將軍與索虜戰失利太宗復令進圍彭城攸之以淮泗既乾糧運不繼固執以

為非往返者七上大怒詔曰云云攸之懼進軍行至遲墟上悔追軍令返

卿春中求伐彭城吾恐軍士疲勞且去冬奔散人心

未宜復用不許卿所啓今便不肯為吾行耶卿若不

行便可使吳喜獨去

與劉劭張興世蕭道成詔

劭字伯猷彭城人歷中領軍以戰死興

世字文德竟陵人歷通直散騎常侍徙光祿大夫道成為齊武帝

吳喜吳興臨安人歷淮陵太守督豫州諸軍事初喜東討白太宗得尋陽王子房及諸賊

即於東臬斬東土既平喜見南賊方熾慮後翻覆受禍乃生送子房還都凡諸大帥顧琛

王曇生等皆被全活上內密銜之及平荊州恣意剽虜賊私萬計其後壽寂之誅喜內懼

因啓乞中散大夫上有疾為身後之慮以喜素得人情乃賜死喜未死一日上與劭等詔



吳喜出自卑寒少被驅使利口任詐輕狡萬端自元  
嘉以來便充刀筆小役賣弄威恩苟取物情處處交  
結皆爲黨與衆中常以正直爲詞而內實阿媚每杖  
計數運其佞巧甘言悅色曲以事人不忠不平彰于  
觸事從來作諸戍主意所不協者覓罪委頓之以示  
清直而餘人恣意爲非一不檢問故甚得物情昔大  
明中黥歙二縣有亡命數千人攻破縣邑殺害官長  
劉子向在會稽再遣爲主帥領三千精甲水陸討伐  
再往失利孝武以喜將數十人至二縣說誘群賊賊  
即歸降詭數幻惑乃能如此故每豫驅馳窮諸狡慝

及秦始初東討止有三百人直造三吳凡再經薄戰  
而自破岡以東至海十郡無不清蕩百姓聞吳河東  
來便望風自退若非積取三吳人情何以得弭伏如  
此其統軍寬慢無章放恣諸將無所裁檢故部曲爲  
之致力觀其意趣止在賊平之後應力爲國計喜初  
東征發都指天畫地云得劉子房即當屏除袁標等  
皆加斬戮使略無生口既平之後緩兵施恩納罪人  
之貨誘諸賊帥令各逃藏受賂得物不可稱紀聽諸  
賊帥假稱爲降而擁衛子房遂得生歸朝廷收羅羣  
逆皆作爪牙撫接優密過于義士推此意正是聞南



賊大盛殷孝祖戰亡人情大惡慮逆徒得志規以自  
免喜善爲姦變每以計數自將於朝廷時三吳首獻  
慶捷於南賊則不殺其黨頗著陰誠當云東人惟怯  
望風自散皆是彼無處分非其苦相逼迫保全子房  
及顧琛等足表丹誠進退二塗可以無患南賊未平  
惟以軍糧爲急西南及北道斷不通東土新平商運  
稀簡朝廷乃至鬻官賣爵以救災困斗斛收斂猶有  
不充喜在赭圻軍主者頓偷一百三十斛米初不問  
罪諸軍主皆云宜治喜不獲已止與三十鞭又不責  
備凡所曲意類皆如此喜至荊州公私殷富錢物無  
復孑遺喜乘兵威之盛誅求推檢凡所課責既無定  
科又嚴令驅蹙皆使立辦所使之人莫非姦猾因公  
行私迫脅在所入官之物侵竊過半納資請託不知  
厭已西難既殄便應還朝而解故槃停託云扞蜀實  
由貨易交關事未回展又遣人入蠻矯詔慰勞賧伐  
所得一以入私又遣部下將吏兼因土地富人往襄  
陽或蜀漢屬託郡縣侵官害民興生求利千端萬緒  
從西還大編小絹爰及草舫錢米布絹無船不滿自  
喜以下迨至小將人人重載莫不兼資喜本小人多  
被使役經由水陸州郡殆徧所至之處輒結物情妄



竊善稱聲滿天下密懷姦惡人莫之知喜軍中諸將非劫便賊惟云賊何須殺但取之必得其用雖復羸弱亦言健兒可惜天下未平但令以功贖罪處遇料理反勝勞人此輩所感惟喜莫云恩由朝廷凶惡不革恒出醜聲勞人義士相與歎息竝云我等不愛性命擊擒此賊朝廷不肯殺去反與我齊今天下若更有賊我不復能擊也此等既隨喜行多無功效或隱在衆後或在幔屋中眠賊既破散與勞人同受爵賞既被詰問辭白百端云此輩既見原宥擊賊有功那得不依例加賞褚淵往南還諸將卒喜爲軍中經爲賊者就淵求官倍于義士淵以喜最前獻捷名位已通又爲統副難相違拒是以得官受賞反多義人義人雖忿喜不平又懷其寬弛往歲竺超之聞四方反叛人情畏賊無敢求爲朝廷行者乃慨然攘步隨喜出征爲其軍副身經臨敵自東還失喜意說超之多酒不堪驅使遂相委棄高敬祖年雖少宿氣力實健其有處分爲軍中所稱喜薄其衰老云無所施正以二人忠清與已異行超之爲人乃多飲酒計喜軍中主帥豈無飲酒者特是不利超之故以酒致言耳敬祖既無餘事直云年老託爲乞郡潛相遣斥其餘主



帥並貪濁諂媚之流皆提携東西不相離舍喜聞天壤間有罪人死或應繫者必啓以入軍皆得官爵厚被處遇應入死之人緣已得活非唯得活又復如意人非木石何能不感設令吾攻喜門此輩誰不致力於國喜自得軍號已來多置吏佐是人加板無復限極爲兄弟子姪及其同堂群從乞東名縣連城四五皆灼然巧盜侵官奪私亡命罪人州郡不得討崎嶇蔽匿必也黨護臺州符旨殆不復行船車牛犢應爲公家所假借者託之於喜吏司便不敢問它縣奴婢入界便略百姓牛犢輒牽殺噉州郡應及役者並入喜家喜兄茹公等悉下取錢盈村滿里諸吳姻親就人間徵求無復紀極百姓嗷然人人悉苦喜具知此初不禁呵索惠子罪不甚江念既已被恩得免憲辟小小忤意輒加刑斬張悅賊中大帥逼迫歸降沈攸之錄付喜云殺活當由朝廷將帥征伐既有常體自應執歸之有司喜即便打鑲解襦與箸對膝圍棊仍造重義私惠招物觸事如斯張靈度凶愚小人背叛之首喜在西輒恕其罪私將下都與之周旋情若同體狼子野心獨懷毒性遂與柳欣尉等謀立劉禕吾



使喜錄之而喜密報令去去未得遠爲建康所錄喜背國親惡乃至於是初從西反圖兼右丞貪因事物以行私詐吾患其諂曲抑而不許從此怨懟意用不平喜西救汝陰縱肆兵將掠暴居民姦人婦女逼奪鷄犬虜略縱橫緣路官長莫敢呵問脫誤有縛錄一人喜輒大怒百姓呼嗟人人失望近段佛榮求還乃欲用喜代之西人聞其當來皆欲叛走云吳軍中人皆是生劫若作刺史吾等豈有活路既無它計正當叛投虜耳夫伐罪弔民用清國道豈有殘虐無辜剝奪爲務害政防國罔上附下罪疊若此而可久容臧

文仲有云見有善於其君如孝子之養父母見有惡於君若鷹鷂之逐鳥雀耿弇不以賊遺君父前史以爲美談而喜軍中五千人皆親經反逆携養左右豈有奉上之心喜志意張大每稱漢高魏武本是何人近忽通啓求解軍任乞中散大夫喜是何人乃敢作此舉止且當今邊疆未寧正是喜輸蹄領之日若以自處之宜當節儉廉慎靜掃閉門不與外物交關專心奉上何得以其雌螭高自比擬當是自顧愆豐事宣遐邇又見壽寂之流徒施修林被擊物惡傷類內懷憂恐故興此計圖欲自安朝廷之士及大臣藩鎮



喜殆無所畏者畏者惟吾一人耳人生脩短不可豫  
量若吾壽百年世間無喜何所虧損若使吾四月中  
疾患不得治力天下豈可有喜一人尋喜心迹不可  
奉守文之主豈可遭國家閒隙有可乘之會耶世人  
多云時可畏國政嚴歷觀有天下御億兆杖威齊衆  
何代不然故上古象刑民淳不犯後聖懲僞易以剝  
墨唐堯至仁不赦四凶之罪漢高大度而急三傑之  
誅且太公爲治先華士之刑宣尼作宰肆少正之戮  
自昔力安社稷功濟蒼生班劔引前笳鼓陪後不能  
保此者歷代無數養之以福十分有一耳至若喜之  
深罪其得免乎夫福之於貴雖以功績致之必由道  
德守之故善始者未足稱奇令終者乃可重耳凡置  
官養士本在利國當其爲利愛之如赤子及其爲害  
畏之若仇讎豈暇遠尋初功而應忍受終敝耳將之  
爲用譬如餌藥當人羸冷資散石以全身及熱勢發  
動去堅積以止患豈憶始時之益不計後日之損存  
前者之賞抑當今之罰非忘其功勢不獲已耳喜罪  
釁山積志意難容雖有功效不足自補交爲國患焉  
得不除且欲防微杜漸憂在未萌不欲方幅露其罪  
惡明當嚴詔切之令自爲其所卿諸人將相大臣股



肱所寄賞罰事重應與卿等論之卿意並謂云何宋並書

封王景文蔡興宗詔太宗剪除暴主又平四方欲引朝望以佐大業乃下

詔景文固讓不許受五百戶

夫良圖宣國賞崇藝命殊績顯朝策勤王府安南將軍江州刺史景文風度淹粹理懷清暢體兼望實誠備夷岨寶曆方啓密贊義旗妖徒干紀預毗廟略宜登茅社永傳厥祚朕澄氛寧樞寔資多士疏爵疇庸寔膺徽烈尚書右僕射領衛尉興宗識懷詳正思局通敏吏部尚書領太子左衛率淵器情閑茂風業韶

遠並謀參軍政績亮時艱拓宇開邑寔允勲典景文可封江安縣侯食邑八百戶興宗可始昌縣伯淵可南城縣伯食邑五百戶

王景文拜中書令詔宋泰始起居注

王言之職摠司清要中將軍丹陽尹王景文夙尚弘簡情度淹粹忠規茂績實宣國道宜兼管內樞以重其任可中書令

手詔王景文景文見後

景文以江州當徙鎮豫章不果徵為尚書左僕射領吏部加太子詹事不願還朝求為湘州刺史不許上手詔譬固辭詹事徙中書令徐羨之字干木王弘字休元啟景仁小名鐵



尚書左僕射卿已經此任東宮詹事用人雖美職次正可比中書令耳庶姓作揚州徐于木王休元殷鐵並處之不辭卿清才令望何愧休元毗贊中興豈謝于木綢繆相與何後殷鐵耶司徒以宰相不應帶神州遠遵先旨京口鄉基義重密邇畿內又不得不用驃騎陝西任要由來用宗室驃騎既去巴陵理應居之中流雖曰閑地控帶三江通接荆郢經塗之要由來有重鎮如此則揚州自成闕刺史卿若有辭更不知誰應處之此選大備與公卿疇懷非聊爾也

又手詔

泰豫元年春上疾篤遣使送藥賜景文死因手詔曰

與卿周旋欲全卿門戶故有此處分並南

蔡景玄還封詔景文父興宗泰豫元年薨遺令奏還封爵追贈後授景玄固辭

不受表疏十餘上詔許

景玄表如此故散騎常侍中書監左光祿大夫開府儀同三司樂安縣開國伯興宗忠恪立朝謀猷宣著往屬時難勲亮帷幄錫珪分壤寔允通誥而懇誠慊訴備彰存沒廉槩素情有絜聲軌景玄固陳先志良以惻然雖彝典宜全而哀款難奪可特申不瞑之請永矜克讓之風



武都王楊僧嗣加爵詔 僧嗣繼從兄元和自立泰始二年詔

僧嗣遠守西疆世篤忠款宜加旌顯以旌義槩可冠

軍將軍北秦州刺史

泰豫元年四月遺詔

朕自臨御億兆仍屬戎寇雖每存弘化而惠弗覃遠軍國凋弊刑訟未息今大漸維危載深矜歎可緩徭優調去繁就約因改之宜詳有簡衷務以愛民為先以宣朕遺意

鄭脩容帖

鄭脩容有兄喪今成服汝可令汝內人知之再報休

祐休範二家內人知也或報 淳化帖○黃伯思云祐晉平王也範桂陽王也

宋史以休祐為休 蓋冊牘傳寫之訛當以祐為是

後廢帝 名昱字德融明帝長子在位五年為蕭道成所弑

大使分行四方詔 泰豫元年四月即位六月下詔明年改元元徽

夫興王經制定先民隱方求廣教刑于四維朕以熒眇夙膺寶歷未言民政未接聽覽眷言乃顧無忘寤寐可遣大使分行四方觀採風謠問其疾苦令有拂民法不便俗者悉各條奏若守宰恩威可紀廉勤允著依事騰聞如獄訟誣枉職事紕謬情公存私害民利已者無或隱昧廣納芻輿之議博求獻藝之規巡



省之道務令精洽深簡行識俾若朕親覽焉

又牧守薦賢詔

夫寢夢期賢往誥垂美物色求良前書稱盛朕以冲  
昧嗣膺寶業思仰述聖猷勉弘政道興言多士常想  
得人可普下牧守廣加搜採其有孝友聞族義讓光  
閭或匿名屠釣隱身耕牧足以整厲澆風扶益淳化  
者凡厥一善咸無遺逸虛輪佇帛俟聞嘉薦

改元大赦詔

元徽元年正月

夫緩法昭恩裁風茂典蠲憲貸責訓俗彝義朕臨御  
宸樞寅制氓寓式存寬簡思孚於惠今開元肆宥萬  
品惟新凡茲流斥宜均弘洗自元年以前貽罪放散  
者悉聽還本土

申土斷詔

元年八月

分方正俗著自虞冊川谷異制煥乎姬典故井隧有  
辨閭伍無雜用能七教克宣入政斯序雖綿代殊軌  
沿革異儀或民懷遷俗或國尚興徙漢陽列燕代之  
豪關西熾齊楚之族並通籍新邑即居成舊泊金行  
委御禮樂南移中州黎庶襁負揚越聖武造運道一  
闕區貽長世之規申土斷之制而夷險相因盈晦遞  
襲歲饉凋流戎役惰散違鄉寓境漸至繁積宜式遵



鴻軌以爲未憲庶阜俗昌民反風定保夷胥山之險  
澄瀚海之波括河圖于五服振玉軻于五都矣

蠲改調役詔

元年四月

國賦氓稅蓋有恒品往屬戎難務先軍實徵課之宜  
或乖昔准湘江二州糧運偏積調役既繁庶徒彌擾  
因循權政容有未革民单力敝歲月愈甚永言矜歎  
情兼宵寐可遣使到所明力詳察其輸違舊令役非  
公限者並即蠲改具調以聞

均賞詔

二年四月

頃列爵叙勲銓榮酬義條流積廣又各淹闕歲往事

留理至逋壅在所參差多違甄飭賞未均洽每疚厥  
心可悉依舊准並下注職

減撤服御詔

二年五月

頃國賦多騫公儲罕給近治戎雖淺而軍費已多廩  
藏虛罄難用馭遠宐矯革淫長務在節儉其供奉服  
御悉就減撤雕文靡麗廢而勿修凡諸游費一皆禁  
斷可詳爲科格

又詔

二年閏三月

頃民俗滋弊國度未殷歲時屢騫編戶不給且邊虞  
尚警徭費彌繁永言夕惕寢興增疚思弘豐耗之制



以敦約素之風庶侍蓄拯民以康治道大官珍膳御  
府麗服諸所供擬一皆減撤可詳爲其格務從簡衷

尚書令袁粲訊獄詔後廢帝即位未親朝政下詔

比亢序愆度留熏燿畧有傷秋稼方貽民瘼朕以眇  
疚未弘政道囹圄尚繁枉滯猶積晨兢夕厲每惻于  
懷尚書令可與執法以下就訊衆獄使冤訟洗遂瘦  
弊昭蘇頒下州郡咸令無壅

贈劉勔詔勔元徽中拒桂陽王休範戰死事平後廢帝下詔

夫義實天經忠惟人則篆素流采金石宣輝自非識  
洞情靈理感生極豈有捐軀衛主捨命匡朝者哉故

持節鎮軍將軍守尚書右僕射中領軍鄱陽縣開國  
侯勔思懷亮粹體業淹明弘勲樹績譽洽華野綢繆  
顧託契闊屯夷方倚謀猷翌康帝道逆蕃扇禍逼擾  
京甸援桴誓旅奉御行師身與事滅名隨操遠朕用  
傷悼震慟于厥心昔王允秉誠下壺峻節均風往德  
歸茂先軌泉途就求寃逝無追思徽崇策式光惇史  
可贈散騎常侍司空本官侯如故謚曰忠昭公

別敕李安民安民見齊

安民元徽初除司州刺史領義陽太守別敕

九江須防邊備空重今有此授以增鄴郢之勢無所



致辭也

南齊書

順帝

諱準字仲謀小字智觀明帝第三子初封安成王蕭道成殞廢帝迎立

即位改元昇明

元徽五年七月

禪于齊

露臺息構義光漢德雉裘焚制事隆晉道故以檢奢軌化敦儉馭俗頃旬服未靜師旅連年委蓄屢空勞蔽莫偃而丹雘之飾糜耗難蒼寶賂之費徵賦靡計今車服儀制寔宜約損使徽章有序勿得侈濫可罷省御府二署凡工麗雕鏤傷風毀治一皆禁斷庶永昭憲則弘茲始政

州郡舉才詔

昇明元年九月

昔聖王既沒淳風已衰龜書來湮龍圖長秘故三代之末德刑相擾世淪物競道諛人諛然猶正士比轂奇才接軫朕襲運金樞纂靈瑤極負屛巡政日晏忘疲永言興替望古盈慮姬夏典載猶傳紺帙漢魏餘文布在方冊故元封興茂才之制地節荆獨行之品振維務本存乎得人今可宣下州郡搜揚幽仄標采鄉邑隨名薦上朕將親覽甄其茂異庶野無遺彥永激遐芳

追謚王敬弘文貞公詔

昇明二年

夫塗祕蘭幽貞芳載越徽猷沉遠懋禮彌昭故侍中



左光祿大夫開府儀同三司敬弘神韻冲簡識寓標  
 峻德敷象魏道藹丘園高挹榮冕凝心塵外清光粹  
 範振俗淳風兼以累朝廷賞聲華在詠而嘉篆闕文  
 猷策韜裏尚想遙芬興懷寢寤便可詳定輝謚式旌  
 追典

武都王楊文度兄弟授爵詔

僧嗣卒文度復自立為武都王遣弟

文弘伐仇池破成兵於蘭臯昇明元年詔

茂賞有章寔昭國度疇庸斯炳載宣史冊督北秦州  
 諸軍事寧朔將軍平羌校尉北秦州刺史武都王文  
 度門乘輝寵世榮邊邑忠果既亮才勁兼彰龍驤將


軍楊文弘肅協成規躬提桴鼓申稜百頃席卷蘭臯  
 功烈之美並足嘉歎宜膺爵授以酬勲績文度可使  
 持節都督北秦雍二州諸軍事征西將軍刺史校尉  
 悉如故



文

牙卷四

四十四





書